

NWER NYI POL NYONO TV ANEB ERO BA LI GO EFESUS

¹ Me Pol wo, ji koro Esowo re me n jol ntiingetib no Kraist Jisos. N kp'nyono nwer nyia tv aneb Esowo ba li go Efesus, bo jio ji kpi ekakesehk go eltoono ni bo kp'toono Kraist Jisos.

² Nong, nnoobo jol a nahne, a elkoono ni lohng goji Esowo Nso ejahre, a Jisos Kraist Ntul ewahre.

Elfuulu ni lohng goji Kraist

³ Nong, wahr tehken Esowo bi li nde no Jisos Kraist Ntul ewahre, bi ma-r fuulu elkohn elfuulu anehng anehng ni etohko, ni li go adi nya li go ejahbetul Esowo, tib eji e li ajehng a Kraist.

⁴ Esowo tohk-r yehke, njini kehm jolo,* tib eji á yehke Kraist,† eji e l'jol ejahre ejahre, k'li ebi ajehng ajehng go ege esamahr. Go ege elkoro wo,

⁵ á toob-r mahne mahne bum elne, eji e l'jol abon ebe sehng goji Jisos Kraist.‡ Ano wo kor-e no, owo wahnge á limi ano,

⁶ eji bo l'tehk ellub ni nnoobo enye nyi á yar-r no, eji á ka-r akor-m mmon ewe.

⁷ Alung eme ma wahnge Esowo ma-r fak yake, fere tahm ka-r go egahre abiafem,§ ma kp'tibi afang nya nnoobo enye,

⁸ nyi á ma gare ka-r, ma rur w'wohng, nyi li elkahne, a ngbere,*

* **1:4 1:4** Jon 15:16 † **1:4 1:4** Rom 8:29 ‡ **1:5 1:5** Jon 1:12 § **1:7 1:7** Kol 1:14 * **1:8 1:8** 1 Kor 1:5

⁹ eji á ma lim re, wahr kahn ntir atahng enye nyi á behre no.† Ano wo kor-e no, á kehm tiri re,

¹⁰ ngare l'biingi, á bahke gohro lim ejum ajehng ajehng sehng goji Jisos Kraist. Owo á bahke koko nsol kpee nyi li go elbung, a nyi li go ndi, ba fadde edi ajehng go elwo ni Kraist.

¹¹ Eji e li ajehng a Kraist, owo wahnge e ma bel ejum elehke elkv,‡ wahr ji bo yehk-r wuku wuku jang jang ana Esowo toobo no, ye ji kpo lim nsol mal kpee, ana á tiri no go ege eltim,

¹² eji elkpin enahre l'jo tehk ellub ene, wahr jia ji gbo mbang jo kunu Kraist ekpu.

¹³ Eji n li ajehng a ne, ano wo wahnge Esowo ma-n kak elliingi ene ngare nyi n wuku alum nya etingitingi, nya li nnoobo etib bi eltahre enahne, fere taame tv Kraist. Elliingi nio ni li Etingi Etohko ji á nyame no,

¹⁴ ji á ko, bom-r esi, tib go ejum ji e bahke lehke elkv, tete ngare rehng nyi á bahk-r fake yake,§ wahr ji li ane ebe ba á ma-r gunu re wahr jo tehk ellub ene.

Ero bi Pol kake no

¹⁵ Eji m ma wuk bade eltaame ni n kp'taame tv Ntul a Jisos, fere wuk bade ana aneb Esowo kpee kpo kor-n,*

¹⁶ n tikem rahke Esowo saam akake tib wahn. Ero ebame bi n kp'kake ka-n, n kp'kake re,

¹⁷ Esowo bi Jisos Kraist Ntul ewahre, bi li nde no kpi ellub, ka-n etohko ji elkahne, a ji bahke lennge Esowo ka-n, eji n l'kahn-e.

† **1:9 1:9** Ef 3:3-9 ‡ **1:11 1:11** Rom 4:13 § **1:14 1:14** 2 Kor 1:22;

5:6 * **1:15 1:15** Kol 1:4

18 N kp'kake ero re, ntim enyahne lennge, a amahr enyahne, eji n l'kahn ekunukpu ji Esowo ka-n no ngare nyi á lung-n no, fere kahn afang nya ellub ni nsol elehke elkv enye kpi no, nyi ane ebe bahke bele,

19 fere kahn egburu nsahm enye nyi nne l'k'ma ko gare, nyi wob-r go egahre atahng, wahr jia ji ma taame. Nsahm ny'nehm nyi li nsahm

20 nyi á ko, nyahme Kraist go elkv, fere rod-e jehke go ege eboblum go ejahbetul.

21 Kraist wo ga gbal sehng atul kpee, a atubesi, a abafiladi, go nne awohng awohng no kpi nsahm.† Mbing enye nyi ga gbal sehng mbing anyehng anyehng go eying jia, a ji kp'bake.

22 Esowo ebyake nsol kpee kak-e go elwo,‡ fere lim-e re, á jol ntubesi no aneb ero, fere jo fili ejum ajehng ajehng.

23 Aneb ero ba li ngubjing nyi Kraist,§ ba m-e lim re, á biingi go nseenga nseenge, ye ji wahnge nsol kpee ma jol go nseenga nseenge.

2

Nnoobo nyi Esowo nyi wahnge n ma bel eltahre

1 Wuku wuku n jolo ane ba ma kpo, tib go egahna nsodo,* a abiafem,

2 nya n tohko jo lim, eji n jo toono eljini ni njini nyia, fere jo toono ntubesi no kp'fili ewuungu, ye ji li etohko ji wob atahng ma ane ba kil elkake Esowo.

† 1:21 1:21 Kol 2:10 ‡ 1:22 1:22 Mat 28:18 § 1:23 1:23 1 Kor 12:27 * 2:1 2:1 Kol 2:13; 1 Tim 5:6

³ Ane bao ba, wuku wuku e jo tohko jen a bo, jo lim nsol nyi jo kor-r, fere jo toono ji jo kor agubjing enyahre, a ntir atahng enyahre. Esi jio ji wahnge e jolo ane ba erakatahng ji Esowo jol gboko tub-r, ana bahke gboko tub ane ba li go njini nyia.

⁴ Wo, Esowo bi kpi egburu ndon. Tib go egburu elkoro ni e kor-e no, ni ni wahnge

⁵ á ma-r ka elkpin a Kraist, jol eji e jolo jol ane ba kpo no, tib go egahra nsodo.† Tibre nnoobo nyi Esowo nyi wahnge m ma bel eltahre.

⁶ Esowo ma-r nyahme go elkv a ne, fere lim-r re wahr ji a ne go adi nya li go ejahbetul, tib eji e li ajehng a Kraist Jisos.‡

⁷ Esowo limi ano, eji á l'tib afang nya nnoobo enye go eying ji kp'bake, nya nne l'k'ma fange, nya li elkoro ni á tib-r no goji Kraist Jisos.

⁸ Tibre nnoobo nyi Esowo nyi wahnge m ma bel eltahre tib go egahne eltaame, wahn sang wahnge, ayare nya Esowo nya.§

⁹ M belem eltahre tib go eltum alimi, eji nne awohng awohng l'k'jo wor nnyo.

¹⁰ Wahr ba li eltum ni Esowo limi no.* Á lim-r goji Kraist Jisos re wahr lim nnoobo nyi Esowo toobo bum wuku wuku re wahr jo lim.

Jisos wo ma ba yang mbang ka-r, nyi li rehng goji Esowo

¹¹ Fvfo, buumen re, go eyaame ji ngubjing n jolo ane baka baka. Jus ji bo kpo lung bo re, “ane ba kpo yehke nrur” jo lung-n re “ane ba kil jo

† 2:5 2:5 Luk 15:24 ‡ 2:6 2:6 Kol 3:1-4 § 2:8 2:8 Gal 2:16

* 2:10 2:10 Fil 1:6

yehke nrur”, nyi li ejum ji nne kpo ko abo lim go ngubjing.

¹² Buumen re, ngare nyio n jolem a Kraist. N jolo ajahmjahm.[†] N woomem go ellong anebe Israel ba Esowo yehke no. M belem ebo abehng abehng go agbanngalung nya Esowo limi a bo, a nsol nyi a nyame tong bo re, bo bahke bele.[‡] N jolo na jol go njini nya, ekunukpu m belem, jol Esowo n kahnem.

¹³ Eji m ma jol ajehng a Kraist Jisos, wahn ji wuku wuku jolo fee, anv, bo ma-n ko, ba a nahne goji Esowo tib go alung ma Kraist.

¹⁴ Tibre Kraist wo ma ko elkoono ba ka-r, ye ji ma lim Jus, a ane baka baka re bo jol ajehng. Ye wo ma ba wa ekahme ji yab-r no.[§]

¹⁵ Elkv ni a kpo no go ngubjing ni wahnge e ki kpe li anebekv ba Esowo, ba kpo soodo atahm. Jisos wo ba range atahm, eji a l'lim njahm ebal ebal, bo jol ajehng, fere jol aneb nfenfe, ba ma bel elkoono a Esowo, tib eji bo li ajehng a ne.*

¹⁶ Kraist kpo go ekros, eji a l'lim re, wahr k'kpe jol go ekv a Esowo, fere lim njahm ebal ebal re jol ana ngubjing anyehng, fere gongo Esowo ka-r tib go egahre abiafem.

¹⁷ Kraist ba, ba tiingi nnoobo etib bi elkoono, tong wahn ane baka baka ba jolo fee, fere tong Jus ji jolo a Esowo bad bad.

¹⁸ Tibre wahr Jus, a wahn ji li ane baka baka, wahr ebting mbang nyi li Kraist, nyi e bahke ma

[†] 2:12 2:12 Ef 5:8 [‡] 2:12 2:12 Rom 9:4 [§] 2:14 2:14 Gal 3:28

* 2:15 2:15 2 Kor 5:17,19

sehng rehng goji Esowo Nsoo, eji e li go etohko na ajehng.

¹⁹ Fvfo, wahn ane baka baka, n kpeem li ajahmjahm, a ajenne. Anv, wahn ebfere jol afono ejahbe a aneb Esowo. Wahn ebyel nnahb nyi Esowo.[†]

²⁰ Bo ma-n ko ana ab'lok, si kunu go nnahb ekahme nyi li abatiingetib,[‡] a abanyehnamahr, nyi Kraist li eltal ni ga ga.

²¹ Ye wo wahng ka akahme etahk yim no, kp'wahre tete song jol mbarebare etahk ji Jehova.

²² Eji n li ajehng a Kraist, owo wahnge bo ma-n tob ko, si etahk jio ji etohko, ji Esowo lene no. §

3

Eltum ni Pol limi go ellong ane baka baka

¹ Me Pol, n li nne a ngbekobo no Kraist tib go egahne esi, wahn ane baka baka.*

² N kp'bumu re, wahn ebwuk ana Esowo ma-m ka eltum nia go ege a nnoobo re me n lim ka-n.[†]

³ Esowo lennge ntoobo nyi á toobo mbehr mbehr ka-m, ana m ma tohko nyon abon alum bade.[‡]

⁴ N l'lung alum nyao, owo m bahke kahne elkahne ename ni n kp'kahne nkpokosi nyi li bada Kraist, nyi Esowo behre no,

⁵ nyi á ki tiki lim ane ba jolo mahne mahne, bo kahn. Anv, yeblennge ka abarebare abatiingetib, a abanyehnamahr sehng go ege etohko.

† 2:19 2:19 Hib 12:22-23 ‡ 2:20 2:20 Mat 16:18; Ell 21:14 § 2:22 2:22 1 Pit 2:4-5 * 3:1 3:1 Fil 1:7,13 † 3:2 3:2 Elt 22:21 ‡ 3:3 3:3 Ef 1:9

⁶ Nkpokosi nyio li re, ane baka baka tob li elkv a Jus, bo fere jol ngubjing anyehng, fere bel nsol nyi Esowo nyame tong bo, nyi li goji Kraist, tib eji bo ma taame tv nnoobo etib.

⁷ Esowo lim-m re me n jol nlokeltum no nnoobo etib bio tib go nnoobo nyi á yar-m no, eji nsahm enye jo tib edu.

⁸ Jol eji me n li li nne no ga rede go ellong aneb Esowo,§ Esowo ma-m ka nnoobo nyi m bahke jo tong ane baka baka bade afang nya Kraist, nya nne l'k'ma ko gare,

⁹ fere lim ane kpee nyehn nkpokosi ejum nyi Esowo toobo no, fere behr mahne mahne, ye ji limi nsol kpee,

¹⁰ eji aneb ero l'wahng atul, a aj'jok ane ba li go ejahbetul Esowo tob kahn ana ajoobo elkahne nya Esowo li no.*

¹¹ Esowo limi ano, ana á tiri no wuku wuku, eji á ma lim re, lohko jol go etingitingi sehng goji Kraist Jisos Ntul ewahre,

¹² ye ji ma wahng e ma bel esahb, mbang ma fere jol ka-r,† nyi li rehng goji Esowo, nyi e bahke ma sehng, k'fahl, tib eji e ma taame tv Jisos.

¹³ Owo wahnge n kp-n gboongo re, ntim ki-n woono tib go erem bi n kp'nyehne go egahne esi, bi li ellub enahne.‡

Elkoro ni Jisos

¹⁴ Esi ejahne ji wahnge n kpo jamme alahng enyame go esamahr Esowo Nsoo,

§ 3:8 3:8 1 Tim 1:12-15 * 3:10 3:10 1 Pit 1:12 † 3:12 3:12 Jon 14:6; Rom 5:2 ‡ 3:13 3:13 Kol 1:24

15 bi gungu nnahb anyehng anyehng nyi li go ejahbetul, a nyi li go njini mbing enye.§

16 N kp'gboongo Esowo bi kpi afang nyao nya ellub ene re, á ka-n eko, eji n l'bel atahne go egahne atahng tib go ege etohko,

17 Kraist fere lene go egahna ntim tib go eltaame,* eji alohk enyahne l'yel rehng edi ji elkoro li no, nnahb ekahme tob kuumu go elkoro,†

18 wahn fere bel nsahm nyi m bahke kahne, a aneb Esowo bako kpee ana elkoro ni Kraist kpange no, fere l'lab, ana rahbe no, fere w'wahre,‡

19 n fere kahn elkoro ni Kraist ni gbale sehng elkahne anehng anehng, eji nsol kpee nyi Esowo kpi no l'rur go egahna ntim,

20 ye ji bahke ma lim sehng ana ji e bahbe no, a ji e tiri no tib go nsahm nyi wob-r go atahng,§

21 nong, á bel ellub goji aneb ero, a goji Kraist Jisos ngare anyehng anyehng tete go njinanjini. Emen

4

Ana ero li ajehng

1 Me ji li nne a ngbekobo tib go esi ji Ntul a Jisos,* n kp-n gboongo re, wahn ji Esowo ma-n lung, belen elkpín ni biingi ana ni Esowo kp'sebe re wahn bel.

§ 3:15 3:15 Elt 17:28 * 3:17 3:17 Jon 14:23 † 3:17 3:17 1 Kor 13:13 ‡ 3:18 3:18 Jon 15:13 § 3:20 3:20 1 Kor 2:9 * 4:1 4:1 Ef 3:1

² Jo reden elnahne, wahn jol soom, jo kpooro. Jo tiben elkoro enahne, eji á kpo kpuumu ka atemtem.†

³ Jo noken, wahn soro asi, jo jol ajehng go etohko, tib go elkono ni Esowo ma-n jabbe kono re wahn jol ajehng.

⁴ Li ngubjing anyehng, a etohko na ajehng, jang jang ana li ekunukpu ajehng ji Esowo bi lung-n no kp'sebe re wahn bel.

⁵ Li Ntul awohng, a eltaame anehng, a ewohn-galahb ajehng fvfo.

⁶ Li Esowo na abehng bi li nde no ane kpee. Á li Ntul no ane kpee. Á kpo ko ane kpee, lim mbang enye. Á wob ane kpee go atahng.‡

⁷ Wo, Esowo ka nne awohng awohng ewahre nnoobo enye, ana Kraist gare nsol ayare enye kar.§

⁸ Ana nwer Esowo bungu no re, “Eji á ma tahm go ero, owo á kehm bobo anebekv ebe kak ngbekobo, fere yare ane.”*

⁹ Eltahme ni á tahme go ero lohngo rejen? Lohngo re, á gbo mbang badde song rehng go atahng ndi.†

¹⁰ Ye ji badde no, ye j'nehm wo tahme go ero sehng elbung sa, eji á l'jol edi ajehng ajehng.‡

¹¹ Ye wo li nne no yare ane, fere lim egom jindiki, bo jol abatiingetib, á fere lim egom jindiki,

† 4:2 4:2 Rom 14:1,3; 15:7 ‡ 4:6 4:6 1 Kor 12:4-6 § 4:7 4:7 1 Kor 12:11 * 4:8 4:8 Mak 3:27 † 4:9 4:9 1 Pit 3:19 ‡ 4:10 4:10 Jon 4:21,23

bo jol abanyehnamahr, egom jindiki abatiingin-noobetib, egom jindiki abaabebul, egom jehko at'tibi,§

¹² eji aneb Esowo l'jol go nseenga nseenge, fere bel ejum ajehng ajehng ji bo bahke koko, jo loko Esowo, toono o, ngubjing nyi Kraist gbal,

¹³ tete e jol go eltaame na anehng, fere kahn Mmon no Esowo, fere gbal kpee, biingi a Kraist jang jang,

¹⁴ eji e l'k'kpe jol abonse ba li ana anyane nya nfeb kpo yehke tv edi ajehng ajehng. Nfeb nyio nyi li ajoobo eltibi nya ane ba kpo nehm ane kpo tib go mbang awak, bo ji kpo seb abang nya bo bahke were ane, fere lim bo, bo tan mbang.*

¹⁵ Ga nob re wahr jolen go etingitingi, fere bel elkoro, fere gbal go mbang anyehng anyehng ka Kraist ji li esi,

¹⁶ ji wahnge ejum ngubjing ajehng ajehng fumu a ngubjing nyio nyi li anyehng tib akon nya Esowo limi no. Ejum ngubjing ajehng ajehng l'jo lim nob nob, owo ngubjing kpo gbal, fere tahne antahng tib go elkoro.

Jolen aneb nfenfe

¹⁷ Alum nya n yahke bung a, m bahke yiimi go mbing nyi Ntul. Kana kpe lim eljini ni ane baka baka kpo lim, ba kpo tir ntir nyi li mbol mbol.

¹⁸ Ntir atahng ebo ebgbo ejanng. Bo li ajahm-jahm go ejang bi Esowo, tib eji bo ki kpi elkpín ene. Tibre ek'kahn ebo, a etahnsi ebo ji wahnge bo li ano.

§ 4:11 4:11 1 Kor 12:28 * 4:14 4:14 Hib 13:9

19 Eltim, bo kpimm. Bobbyake elbo ka re bo jo famme yannege. Eljohn ejum ajehng ajehng ji ki li saang kpehme tiki gbal bo.

20 Nsol nyio sang á kpili goji Kraist.†

21 Wahn eblohko wuk bada ne. Bo tib-n etingitingi ji li goji Jisos.‡

22 Kana kpe jol eljohn ane ba wuku wuku á jolo no ngare nyi á jolo go egahne nk'kulu elkpín, ni ma ranngé tib ekor nsol nyi kpo nehm nne.§

23 Nong, ntim enyahne, a ntir atahng enyahne jol nfenfe.

24 Jolen aneb nfenfe ba Esowo limi go ege elfoongo, ba li go etingitingi, fere li ebo ebo ka Esowo.

25 Kana kpe kiimi afahngé! Nne awohng awohng jo bung etingitingi tong mmonannyehn! Tibre nne awohng awohng ewahre li ejum ngub-jing ny'nehm na anyehng.

26 Ntim l'rak-n, kana jo taame, eji erakatahng ejahne l'ko-n, á song lim abiafem. Kana taame re, njul lahm tv-n erakatahng go egahna ntim.*

27 Kana jo ka nnehm eyake ajehng ajehng.

28 Nne no kpo v ejv, á k'kpe v. Ga nob re, á jo bade, jo lim etingitingi eltum go ege abo, eji á l'mal tob jo ka nne no li go elehng nsol.

29 Nong, ebi ellum anehng anehng k'jo lohngen go nnyo.† Jo bungen alum nya nno, nya fuumu no, nya bahke jo kak ane ebo, eji l'jo nob a ane ba l'wuk.

† 4:20 4:20 Mat 11:29 ‡ 4:21 4:21 1 Jon 2:29 § 4:22 4:22 2 Kor 5:17 * 4:26 4:26 Jems 1:19-20 † 4:29 4:29 Ef 5:4

³⁰ Kana jo lim re, Etingi Etohko ji Esowo jo jol ndon ndon, ji Esowo ka-n no ana elliingi ni kp'tibi re, efung kp'bake bi Esowo bahk-n fake yake.‡

³¹ Yaken nsol nyia kpee, ana eljolo maange maange, atahng amoongo, eltim arake, elrabe tob atemtem, afahnge akiimi lake ane, a eblum alimi.

³² Ga nob re wahn jo tib atemtem nnoobo eljini, fere bel eltim ndon, fere jo tahm ka atemtem, ana Esowo ma tahm ka-n, tib eji n li ajehng a Kraist.

5

Eljini ni anebe nfenfe

¹ Eji n li akorokoro abon ba Esowo, jolen ane ba kp-e toono.*

² Jo jenen go elgoro, jang jang ana wahr koro Kraist, á yake elne ka tib go egahre esi ana ejum ayare, a ejum njom ji kp'vohko Esowo eleenge.†

³ Jol kana jo gahm nsol ana anebkal akono, a nsol nyi ki li saang, a amahr abaare. Tibre fuumem re jol ano go egahne ellong, eji n li aneb Esowo.

⁴ Jol tohkem f'fuumu re nsol nyia jol go egahne ellong ana abi aka atubu, ayok alimi, a abuuru akpaale. Ga nob re wahn jo kak Esowo saam.‡

⁵ Tibre jia li re wahn kahn re, nne awohng awohng no kpo noongo a ane limm, no bahke bele ejum elehke elkv ajehng ajehng go ejahbetul ji Kraist, a ji Esowo. Ano wo fvfo bahke tob jol ka nne awohng awohng no ki li saang, a nne no kpo

‡ 4:30 4:30 Ef 1:13-14 * 5:1 5:1 Kol 2:6 † 5:2 5:2 2 Kor 2:15

‡ 5:4 5:4 Ef 4:29

baare amahr go nsol ane. § Tibre elkohn nne noo li ana njomeblom.

⁶ Nong, nne awohng awohng ki-n nehm go alum nya ki lohng ejumjum. Tibre nsol nyia nyi wahnge erakatahng ji Esowo bahke gboko tub ane ba kil jo wuk-e.

⁷ Fvfo, nobo re wahn k'jo jen a bo.*

⁸ Tibre wuku wuku n jolo ejanng. Any, wahn ebjol ellenng, tib eji n li ajehng a Ntul a Jisos. Jo jenen ana abon ba ellenng.

⁹ Akab nyao nya ellenng li go nsol nyi kp'nobo, a nsol nyi li go nseenge, a nyi li go etingitingi.†

¹⁰ Jo tiren, wahn kahn ji kp'koro Esowo.‡

¹¹ Kana jo yel ellong ane ba kpo lim nsol nyi ki lohng ejumjum, nyi li ka ejanng. Ga nob re wahn jo tib gbul gbul gbuul re, nsol nyio ejumjum o lohngem. §

¹² Tibre nsol nyi bo kpo lim mbehr mbehr, ebfilindon sehng re nne bung bade.

¹³ Ejum ajehng ajehng ji bo l'ko ba a ji go edi ji ellenng li no, ji ji ma jol gbul gbul gbuul. Tibre ejum ajehng ajehng ji l'jol gbul gbul gbuul, ji ji li ellenng.*

¹⁴ Owo fvfo bo bungu re,
 “Nyahme, wo ji kp'lale,
 lohng go ellong akvne,
 wo mehl yiimi,
 owo Kraist bahke jo ya tub-a.”

§ 5:5 5:5 1 Kor 6:9-10 * 5:7 5:7 2 Kor 6:14 † 5:9 5:9 Gal 5:22-23

‡ 5:10 5:10 Rom 12:2 § 5:11 5:11 Jon 7:7 * 5:13 5:13 Jon 3:20-21

¹⁵ Jo kunen ekpu ana n kp'jene. Kana jo jen ana ane ba kil elkahne ejumjum. Jo jenen ana akahnkahn ane.

¹⁶ Kana jo ranngere ngare enyahne mbol mbol. Tibre ngare nyia ebi ngare nyi.

¹⁷ Owo fvfo, nobo re wahn k'jol agboolo. Jo kahnen ji Esowo kp'sebe re wahn jo lim.

¹⁸ Kana jo wo, fere jo b'buumu! Bahk-n ranngere na.† Ga nob re etohko ji Esowo jo rur go egahna ntim.

¹⁹ N' l'kehm bungu atemtem, jo koon alum Saams, wahn fere jo ko ase Esowo atehke, a ase nyao nya etohko. Jo yimen ase go egahna ntim, wahn jo tehk Esowo.

²⁰ Jo kaken Esowo Nso ejahre saam ngare anyehng anyehng go ejum ajehng ajehng, go mbing nyi Jisos Kraist Ntul ewahre.‡

Akal ane, a alum ane

²¹ Jo woomen atemtem go elwo tib go elfahle ni n kp'fahle Kraist.§

²² Akal ane, jo woomen alum ebahne go elwo. Tibre ano wo li mbang nyi Esowo.*

²³ Tibre nlum a nne wo li ntubesi no nkal ewe, ana Kraist tob li ntubesi no aneb ero, ba li ngubjing enye.† Á tob li nt'tahre abo.

²⁴ Ana aneb ero wob Kraist go elwo, nong, akal ane fvfo tob woomo alum ebo go elwo go ejum ajehng ajehng.

† 5:18 5:18 Luk 21:34-35 ‡ 5:20 5:20 1 Tes 5:18 § 5:21 5:21 1 Pit 5:5 * 5:22 5:22 1 Pit 3:1-7 † 5:23 5:23 1 Kor 11:3-9

²⁵ Alum ane, nong, akal ebahne jo kor-n, ana Kraist, aneb ero kor-e no, á yake elne ka tib go bo esi,

²⁶ eji á l'jo lim bo, bo jol ebo ebo ngare nyi á ma lim bo ma bar, tib eji á ma wohngo bo alahb go ege alum.

²⁷ Á limi ano, eji aneb ero l'yiimi a egburu ellub go ege esamahr, k'bel elem ajehng ajehng, a agbahnggenne, a ejum ajehng ajehng ji li go elfoongo nio, eji bo l'jol ebo ebo, k'bel egahme ajehng ajehng.

²⁸ Alum ane, nong, akal ebahne jo koren ana agubjing enyahne wahnfono antahng. Nne no nkal ewe l'kor-e, ngubjing enye nyi kp-e koro.

²⁹ Nnene limm, no ma k'ko ngubjing enye ekv. Á kpo le ngubjing enye, fere jo kuuru, ana Kraist kp'limi ka aneb ero.

³⁰ Tibre wahr ba li ngubjing enye.‡

³¹ Ana nwer Esowo bungu no re, “Esi jia ji wahnge nne bahke tahme nde, a nnyehn sa, bo song jol ano a nkal ewe. Bo ane abal abal bahke fere jol ajehng.”

³² A egburu nkpokosi nyi. N kp'bungu bada Kraist, a aneb ero ebe.

³³ Tob li ka wahn re, nne awohng awohng ewahne, nkal ewe jo kor-e ana ngubjing enye. Nong, nkal a nne jo kak nlum ewe.§

6

Bade babnde nne, a abon ebo

‡ 5:30 5:30 1 Kor 11:11-12 § 5:33 5:33 Kol 3:18-19

¹ Abonse, jo wuken babnso ejahne, a babnne ejahne, eji n li abon ba Jehova. Tibre a wo li etingitingi mbang.*

² “Kak nso, a nne!” A wo li ngbokambang a ntahm nyi Esowo ka no, fere nyam enyam kunu re,

³ “Bahke nobo a na, a fere kang nnya tvv go ejahbe jio.”

⁴ Babnde nne, kana jo fili abon ebahne go mbang nyi bo bahke jo bel erakatahng.† Ga nob re wahn jo le bo, fere jo luumu bo, a elle atubu go mbang nyi Jehova.‡

Bade babnde aju, a aju ebo

⁵ Aju, jo wuken babnso ejahne ba njini nyia, wahn fere jo fahl bo, fere jo kahm bo. Jo loken bo a eltim anehng, ana n kp'loko Kraist.§

⁶ Kana jo lim eltum ngare nyi bo kp-n nyehne nyi nyi, ana ane ba kpo lim ji kpo kor ane. Jo limen ji Esowo kp'sebe re wahn lim a ntim a ntim enyahne ana aju nya Kraist.

⁷ Kana jo loko elmooko elmooko. Jo loken ana ane ba kp'loko Jehova, ba kil loko ane,*

⁸ eji n kp'kahne re, nnoobo anyehng anyehng nyi nne limi no, nyi nyi Jehova bahke feere a nyi ka-e, jol afi á jolo nju, afi nju á jolem.

⁹ Babnde aju, tob jo limen ano jang jang ka aju enyahne. Kana kpe jo nehke bo, eji n kp'kahne re n kpi nde na awohng go ejahbetul, no kil jo rang nne awohng awohng.†

* 6:1 6:1 Luk 2:51 † 6:4 6:4 Kol 3:21 ‡ 6:4 6:4 Hib 12:9-10

§ 6:5 6:5 Kol 3:22-25; Tait 2:9-10; 1 Pit 2:18 * 6:7 6:7 Kol 3:17

† 6:9 6:9 Kol 4:1

Nsol ebta nyi nne Esowo

¹⁰ Abonanee, es'kohro elbundu ename ni a, ni li re wahn bel atahne nyao nya Esowo, nya lohng go nsahm nyi agbal enye.

¹¹ Jo kaken nsol ebta nyi Esowo ka-n no, eji n l'mal yiimi a nnehm, a awak enye.‡

¹² Tibre e nehme nok a ane, e kp'noko a abi atohko, ana atul, a aj'jok ane, a atubesi ba eying jia ji anv ji ejanng, a ellong abi atohko gbalee nya li go adi nya li go elbung.

¹³ Owo fvfo, nobo re wahn rod nsol ebta nyi Esowo kak, eji n l'mal elyiimi go eb'bi efung bio o.§ Eji m ma lim ano kpee mal, owo m bahke yiimi.

¹⁴ Anv, yiimen ana ane ba ma gbaange egbaange ji li etingitingi go ebun.* Kaken ngbangbang nyi nsoja kpo ko bam ngang, nyi li eno ji m ma li go esamahr bi Esowo.†

¹⁵ Kaken akpaketa go egahne akpade, nya li ebjng bi m ma toobo re wahn song tiingi nnoobo etib bi elkoono.

¹⁶ Filen ekum bi bahk-n bame kpee, bi li eltaame ni m bahke ma jo gbiiri atakelban nya Ebinne, nya li agun agun.‡

¹⁷ Konngen ekpasi ebta ji li eltahre, wahn rod ekahngkahng bio bi etohko, bi li alum Esowo.§

¹⁸ Jo limen nsol nya kpee go ero akake, a Esowo agboongo. Jo kaken ero ngare anyehng anyehng ana Etingi Etoko kp-n tibi. Jo baaben, eji n

‡ **6:11 6:11** 2 Kor 10:4; 11:14 § **6:13 6:13** Ell 3:10 * **6:14 6:14**
 Luk 12:35 † **6:14 6:14** 1 Tes 5:8 ‡ **6:16 6:16** 1 Pit 5:8-9; 1 Jon
 5:4 § **6:17 6:17** Mat 10:34

kp'kake ero, ki-n jo kpen. Jo gboongen Esowo ka aneb Esowo bako kpee,

¹⁹ a me fvfo, eji Esowo l'ka-m alum nya m bahke jo bung a esahb esahb, fere tiingi ane nkpokosi a nnoobo etib,*

²⁰ bi wahnge Esowo kak-m eltum. Jo kaken ero tv-m, eji n l'jo bung esahb esahb ana fuumu re me m bung, jol eji n wobo wob ngbekobo.†

Ana Pol kake bo nnyo

²¹ Tikikus ji li akor-m mmonannee,‡ ye ji tob li nkakesehk a nlokeltum go eltum ni Jehova bahk-n tongo ejum ajehng ajehng, eji n l'kahn ana n li ga, fere kahn ji n kp'limi.

²² Ji wahnge m m-e tum tv-n, n tum-e, eji n l'kahn ana e li ga, á fere kak-n eltim.§

²³ Nong, Esowo Nsoo, a Ntul a Jisos Kraist ka abonanee elkoono, a elkoro, a eltaame.

²⁴ Nong, nnoobo nyi Esowo jol a ane ba elkoro ebo l'k'tiki mal, ni Jisos Kraist Ntul ewahre kpi bo kor.

* **6:19 6:19** 2 Tes 3:1; Elt 4:29 † **6:20 6:20** 2 Kor 2:17 ‡ **6:21 6:21** Elt 20:4; 2 Tim 4:12; Tait 3:12 § **6:22 6:22** Kol 4:7-8

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4